

1 Yon

Yon belen hanƙapya asan gago kayyin

Mere forok yenbe Al Kurun dilinde al gergen yiryin

¹ Be, asan gabe al kura Al Kurunyen Mere inen hanyen al goke kayen tihim. Al gobe alya bereya megen han kurun gayen Al Kurun dilinde gergen yird yird al. Yenbe megenya nanƙinya, irde det kurun gayen forok ma yekeya hinhin. Nenbe al gore mere tike nurde hinhet, dilyninde kenen hinhet. Irde mata ten hike kenen hinhet, irdeb hannininde wor po sisan urde nurde hinhet.

² Alya bereya Al Kurun dilinde gergen yird yird al goyen Al Kurun belen ten kawan irke tumnan ala kenen hinhet. Irdeb yen ge tagalde hityen. Yenbe alya bereya goyen Al kurunya hen hen gote min al. Al gobe Al Kurunya momonde hitin al. Al Kurun belen dilyninde kawan irke kintirin goyen goke gago momon dirde hite. ³ Nenbe al goyen kenen hinhet, irde meremin nurde hinhet kurun goyen momon dirde hite. Gogab den wor yen ge dufaytin taren irkeb nenya tumnan awalikde hitek. Irdeb denya nenya tumnan Al Kurunya Urmin Yesu Kristuya irde awalikde hitek.

⁴ Ningeb asan ga kan hite gabe den wor bebak ten Yesu nin dufaytin sanin irkeb denya nenya tumnan aman hetek yenbe gago kan hite.

Al Kurun dilingde wukken hen yenya awalikde hitek

⁵ Be, saba Yesu belen dirke nurtin goyen gago momon dirnin tihit. Mereminbe gahade: Al Kurunbe hushi yara wukken wor po, mata bulun minmon. Mata bulunyen kidoma goyen dirnen mun kura yen hitte ma hi. ⁶ Ningeb nen gayen Al Kurunya awalikde hite yen hitek gega, kidoma bana hitek gobe usi ten hitek, irde Al Kurunyen mere fudinde goyen ma gama irde hitek. ⁷ Goyenpoga nen gayen Al Kurun hushi yara wukken wor po hi gwahade goyen hen mata igin po ten hitekbe fudinde wor po nenbe kadrinin ya awalikde po hitek. Irdeb Yesu nen ge ten darim wok irde kamyin goke ten Al Kurun belen mata buluninin halde dunke wukkek wor po hitek.

⁸ Be, nen gayen mata buluninin minmon, nenbe huwak hite yen hitek gobe nindiken usi wor po irde hitek. Gwahade yen hitek gobe Al Kurunyen mere fudinde goyen binininde ma hikeb gogo gwaha yen hitek. ⁹ Munan nen gayen mata buluninin goke Al Kurun pohogay irde hitekbe yen belen halde dunyen. Irde yen dilingde mata huwak mon goyen yad sin a yirde wukkek diryen. Yenbe gwaha tiyen yirin gobe fudinde wor po gwaha tiyyen, irde mata huwak po ten hiyen al geb, gogo mata buluninin halde dunen wukkek diryen. ¹⁰ Be, Al Kurunbe al gwahade geb, nen gayen mata bulun ma po ten hityen yetek gobe Al Kurunbe usi al intek. Gwaha ten hitekbe meremin goyen epte ma binininde hiyen.

2

Yesu Kristu belen faran durde hi

¹ Ningeb, dirinne yago, asan gabe mata bulun ma ten hinayin yen gago kan hime. Goyenbe kurare son hen mata bulun titekbe mata buluninin halde dunen dunen nin Adoninin Al Kurun gusunan irtek al kura hi. Yenbe Yesu Kristu, Al Huwak wor po. ² Yenbe mata buluninin Al Kurun belen halde dunwon yen nurdeb nen ge ten kamyin. Kamyin gobe nen ge po mon, alya bereya kurun megen ga hike kwa goyen goke manan kamyin.

Al Kurun nurd unen han marbe meremin gama irde han

³ Be, nenbe Al Kurun belen gwaha gwaha ten hinayin dintin goyen ten hitekbe fudinde Al Kurun nurde unen hite yen nurde hitek. ⁴ Goyenbe al kura belen, “Nebe Al Kurun kenkela nurde unen hime,” yiyyen gega, mata gwaha gwaha ten hinayin yitin goyen ma ten hiyen al gobe usi al. Al gobe Al Kurunyen mere fudinde goyen binde ma hiyen geb, gogo gwaha ten hiyen. ⁵ Munan al kura Al Kurunyen mere gama irde hiyen al gobe fudinde wor po Al Kurun nin amanen nurde hiyen geb, gogo gwaha ten hiyen. Nenbe mata gwahade ten hitek gab fudinde Al Kurunya hite yen bebak ten hitek. ⁶ Ningeb al kura, “Nebe Al Kurunya har,” yiyyen al gobe Yesu belen mata igin ten hinhin gwahade po ten hiyen.

⁷ Be, kadne yago, nebe saba gergen kura ma kan dunen hime. Han kapya ne belen saba dirmeke nuramin goyen po sopte kan dunen

tihim. ⁸ Goyenbe saba gobe han̄ka saba diren̄ tihim goya tun̄ande. Saba gote iginen̄ fudin̄debe Yesu bel̄en̄ mata ten̄ hin̄hin̄ bana gon̄ mat kawan forok yen̄ hin̄hin̄. Irde matatin̄de wor kawan forok yen̄ hi. Gwaha ten̄ hi gobe kidomare nin̄ mata bulun̄be hubu hen̄ hikeb hulsire nin̄ mata igin̄ fudin̄de goyen bikken̄ kawan hen̄ kurun̄ hen̄ hi geb, gogo gwaha ten̄ hi.

⁹ Nin̄geb al kura, “Nebe hulsire hime,” yen̄ hi gega, kadom kura goke igin̄ ma nurde haram irde hi al gobe kidoma bana po hi. ¹⁰ Mun̄an̄ al kura kadom nin̄ aman̄en̄ nurde hi al gobe hulsire hi. Irkeb dufay bulun̄ kura bin̄de ma hi geb, epte ma son̄ hen̄ mata bulun̄de katyen̄. ¹¹ Goyenbe al kura kadom kura goke igin̄ ma nurde haram irde hi al gobe mata bulun̄yen kidoma bana po hen̄ gor nin̄ mata po ten̄ hi. Al gobe mata bulun̄yen kidoma bana hi geb, kidoma gore dilin̄ pet tike bel̄en̄ ma kenen̄ kun̄ hiyen̄ go gwahade goyen po, mata bulun̄ po ten̄ hi.

¹² Den̄ dirin̄be Yesu Kristu bel̄en̄ mata tiyyin̄ goke ten̄ Al Kurun̄ bel̄en̄ mata bulun̄tin̄ halde duntin̄ han̄ geb, gago asan̄ kan̄ dun̄en̄ hime.

¹³ Den̄ salannen̄be Yesu Kristu gwahader hitin̄ al goyen nurde un̄en̄ han̄ geb, gago asan̄ kan̄ dun̄en̄ hime.

Den̄ al fon̄en̄be Satan mata bulun̄de dukutek al goyen fole iran̄ geb, gago asan̄ kan̄ dun̄en̄ hime.

¹⁴ Den̄ dirin̄be Adoninin̄ nurd un̄en̄ han̄ geb, gago asan̄ kan̄ dun̄en̄ hime.

Den salannenbe Al Kurun gwahader hitin al goyen nurde unen han geb, gago asan kan dunen hime.

Den al fonenbe taren po Al Kurun nin hekken nurde han, irde meremin goyen bitin bana kerde gama irde han,
irde Satan mata bulunde dukutek al goyen fole iran geb, gago asan kan dunen hime.

Megen nin mata goke amanen ma nurnayin

¹⁵⁻¹⁶ Ningeb denbe megen nin marte mata bulunya dufay bulunya kurayen kurayen kurun goke amanen ma nurde hinayin. Mata megen nin mar beken ten hanyen gobe gahade: ulinde po aman hetek beken nin nankenen han, irde det kura kenen tetek po yen goke po nurde han, irde detminya mataminya goke yingen turun turun ten han gobe megen nin marte mata. Mata gwahade ten han kurun gobe Al Kurun hitte mat ma watin. Mata gobe megen gar nin po. Ningeb al kura megen nin marte mata bulun goke amanen nurde hi al gobe epte ma binde mat Adoninin ge amanen nuryen geb. ¹⁷ Megen nin marbe hubu henayin, irde mata bulun titek dufay go manan hubu hiyyen. Goyenbe Al Kurunyen dufay gama irde han marbe yanya huginen hinayin.

Yesu Kristu asogo irde han mar nin kenkela henan ko

¹⁸ Be, dirinne yago, nalu gayenterbe megen gayen hubu hetek gobe binde hen hi. Nalu funan binde hekeb Yesuyen asogo wayyen yeke nurde hanyen gwahade po, asogominbe bikken budam forok yan. Ningeb go mar goyen yenenbe

nalu funanbe binde hen hi yen bebak ten hite. ¹⁹ Mel gobe Yesu gama irhet irhet tikeb nenya tumnan hinhet gega, dubul diran. Mel gobe nenya tumnan hitek mon. Munan tumnan hitek manhan nenya awalikde hitewon. Goyenbe mel gobe nen dubul ten kun Yesu asogo irde han geb, matamin goreb, “Nenbe dende mon,” yen dikala dirde han.

²⁰ Denbe Yesu belen Holi Spirit duntin han geb, den tumnan mere daminbe Al Kurunyen mere fudinde goyen bebakken nurde han. ²¹ Ningeb asan kan hime gabe mere fudinde goyen ma nurde han yen gago asan kan dunen hime? Mon. Denbe mere fudindebe damin goyen nurde han, irde usi merebe saba fudinde goyenter mat ma forok yen hi yen nurde hime geb, asan gago kan dunen hime. ²² Ningeb denbe usi albe ganun yen nurde han? Usi al gobe, “Yesube Mesaia mon,” yen hi al gogo. Al gwahade gobe Yesu Kristuyen asogo wor po. Al goreb Al Kurunbe Yesu Kristu Nanin, irde Yesu Kristube Al Kurun Urmin goyen fudinde yen ma nurde hi. ²³ Ningeb al kura Al Kurun Urmin pel irde han marbe Nanin wor pel irde han. Munan al kura Al Kurun Urmin nurd unen han marbe Nanin wor nurd unen han. ²⁴ Ningeb saba han kanya dirmeke nuramin gobe bitinde kerde kenkela po gama irde hinayin. Gwaha ten hinayinbe Al Kurunya Urmin Yesuya irde hinayin. ²⁵ Irde gwaha ten han marbe Al Kurunya huginen hinayin yen Yesu belen bin a tiyyin goyen dunyen.

²⁶ Be, nebe mata bulunde katnayin yen bitin

yawarnin kurut yen han mar goke hayhay dire yen asan gago kan dunen hime. ²⁷ Denbe Yesu belen Holi Spirit dunyin goyen den bana hi. Ningeb al kura belen epte ma saba dirtek han. Holi Spirit yingen belen daminbe fudinde goyen tumnan saba dirde hi. Irde sabaminbe fudinde usi mon geb, Holi Spirit belen dinen hiyen gwahade po, Yesu Kristuya po hinayin.

Neŋbe Al Kurun dirnen wen

²⁸ Be, dirinne yago, huginen yenya hinayin. Gogab yen mulgan hen megen gar wan wan nalureb kenen kenen nin kafura ma henayin, irde memya ma henayin. ²⁹ Denbe Yesu gob al huwak wor po yen nurde han kenem alya bereya Al Kurun dilinde mata huwak ten han mar gobe Al Kurun dirnen wen yen nurde hinayin.

3

¹ Fudinde wor po, Adonininbe nen gayen gake bubulkunne wor po yen nurde dunen hiyen. Irde gwahade nurde dunen hiyen gobe kurun wor po geb, dirinne wen dinen hiyen. Fudinde, nenbe yende dirnen wen! Goyenbe megen nin mar belen nenbe Al Kurunyen dirnen wen hitin goyen bebak ma ten han. Mel gobe Al Kurun ma nurde unen han geb, gogo denen bebak ma ten han. ² Kadne yago, nenbe Al Kurunyen dirnen wen. Gega gayenterbe kame dahade hetek gobe ma nurde hite. Goyenbe Yesu Kristu wake gab yenbe dahade hi goyen kente geb, nen wor yen yara hetek gobe nurde hite. ³ Ningeb al kura kame gwahade hitek yen nurde goke doyan hen han

marbe Yesu gobe mata bulun minmon wukken hi gwahade po, mel goyen wor mata bulun ma ten Al Kurun dilinde wukken po hinayin.

⁴ Be, mata bulunbe Al Kurunyen saba pel ird ird mata. Ningeb al kura mata bulun tiyyen al gobe Al Kurunyen saba pel iryen. ⁵ Goyenbe Yesu belen nende mata bulun yad sina yiren yen wayyin goyen denbe nurde han gogo. Fudinde, yenbe mata bulun minmon wor po. ⁶ Ningeb al kura yenya han marbe mata bulun ten teban ma ten hanjen. Munan al kura gwaha ten han marbe Yesube al gwahade yen bebak ma ten han irde yen ma nurde unen han mar.

⁷ Ningeb, dirinne yago, al hoyan belen mata bulunde dukunak geb, kenkela hen ga hinayin. Al kura mata huwak po ten hi al gobe Yesu Kristu al huwak gwahade goyen po, yen wor Al Kurun dilindebe al huwak. ⁸ Munan Satan gobe megenya nanjingya ma forok yekeya mata bulun min uryin al geb, al kura mata bulun ten hi al gobe Ungura gote dirin. Al Kurun Urmin megen gar katyin gobe Ungurayen meten bulun goyen isikame yenbe gogo katyin. ⁹ Ningeb al kura Al Kurunyen dirin hitin al gobe Naninde dari igin goyen minyan hi geb, mata bulun kuyin kuyin ma ten hiyen. Al gobe Al Kurunyen dirin geb, epte ma gwaha ten hiyen. ¹⁰ Ningeb al kurate mata kenenbe al gobe Al Kurunyen dirin ma Ungurayen dirin goyen bebak ten hityen. Mata gobe gahade: al kura Al Kurun dilinde mata huwak mon goyen ten hi al gobe Al Kurunyen dirin mon, irde kadom nin amanen ma nurde hi al go wor Al Kurunyen

dirin mon.

Kadtiŋ yagoya kadom amanen nurd gunen ten hinayin

¹¹ Be, den belen hanƙapya wor po Yesu gama irde Al Kurunyen mere nuramin gobe gahade: kadinin yagoya kadom amanen nurde gunen ten hitek. ¹² Ningeb denbe Kein yara ma henayin. Yenbe Satan yufuk bana hinhin geb, kulin yende gogo mayke kamyin. Goyenbe da misinde kulin mayke kamyin? Gobe Al Kurun dilingde Keinyen matabe bulun wor po, munan kulindebe huwak geb, kulin nin igin ma nurdeb gogo mayke kamyin.

¹³ Ningeb, kadne yago, megen nin mar belen igin ma denen haram dirkeb goke hurkunƙat ma tinayin. ¹⁴ Nenbe kadinin yago nin amanen nurd gunen ten hite. Ningeb kamde kamde taren goyen fole irde Al Kurunya huginen hitek yen nurde hite. Ningeb al kura kadom nin amanen ma nurde hi al gobe Al Kurunyen dilingde al kamtin hi. ¹⁵ Irde al kura kadom nin igin ma nurde haram irde hi al gobe al gasa yirke kamde kamde al yara. Ningeb al gwahade gobe epte ma Al Kurunya huginen hiriryen gobe nurde han gogo.

¹⁶ Munan Yesu Kristube nen ge ten yingen ge ma nurde kamyin. Ningeb mata tiyyin goreb kadinin ge amanen nurtek belnen goyen dikala dirde hi. Goke tenbe nen wor kadinin ge amanen nurdeb igin yen ge ten kamtek. ¹⁷ Goyenbe al kura samun minyan gore kadom kura det nin amu hen hi goyen kura kinyen gega,

buniñeñ ma nurde unyenbe dahadem, “Nebe Al Kurunñ nin amanenñ nurde unenñ hime,” yiiyyen? Epte moñ. ¹⁸ Ningeb, dirinne yago, mohonñiniñde mat po kadininiñ yagonñ amanenñ nurde yunenñ hite ma yenñ hitek. Gwaha titñenbe bininiñde mat fudinde wor po faranñ yurde hitek. ¹⁹⁻²⁰ Gwaha titekbe nenbe Al Kurunyen mere fudinde goyen po gama irde hite yenñ nurtek. Munanñ mata kuranñ nurde bulunñ titiñ yenñ bininiñde mat goke po kandukñenñ nurde hityen gobe dufayniniñbe wukkenñ moñ geb, gogo gwaha tenñ hityen. Gega Al Kurunyen dufaybe nende folek, irde nenñ ge kenkela wor po nurde hi geb, nenñ belenñ kandukñenñ nurtek mata goke beararnenñ ma nurde dunenñ hiyen. Ningeb Al Kurunya henñ yenya mere tenñ tenñ ninñ kafura ma henñ hite gago.

²¹ Be, kadne yago, Al Kurunbe gwahade po mataniniñ ge mali ma dinenñ tenñ hiyen. Ningeb nenbe mereminñ po gama irde mataniniñ ge kandukñenñ ma nurdeb Al Kurunya mere tenñ tenñ ninñ kafura ma henñ hityen. ²² Irdeb det kuranñ nurde gusunañ irde hityen kurunñ gobe tumñanñ dunenñ hiyen. Nenbe mereminñ po gama irde mata kura yenñ belenñ amanñ hetek goyen po tenñ hityen geb, gogo det kuranñ gusunañ irtekeb det gobe tumñanñ dunenñ hiyen. ²³ Be, sabaminñ kurunñ gote minñ wor pobe gahade: Yesu Kristube Al Kurunñ Urminñ gobe fudinde yenñ nurtek, irde Yesu belenñ yirinñ gwahade po, kadininiñ yagonñ amanenñ nurd gunenñ tenñ hitek. ²⁴ Al kura sabaminñ goyen gama irde mata tenñ hanñ marbe yenya hanñ, irke yenñ wor mel goya hanñ. Munanñ Yesu nenya hite gobe Holi

Spirit Al Kurun belen duntin gore bebak dirkeb nurde hite.

4

Al Kurunyen mere basan mar falkuk nin kenkela hen hinan ko

¹ Be, kadne yago, megen gabe Al Kurunyen mere basan mar porofet falkuk budam wor po hanj. Ningeb al kura wan, “Nebe Holi Spirit belen mere nunke gago tagalde hime,” yeke bemel ma yen ge hekken nurnayin. Gwaha titnenbe al go fudinde Holi Spirit belen mere irtin ma gwahade mon goyen kenkela kenen bebak ten hinayin.

² Ningeb al gote sababe fudinde Holi Spirit belen untin ma ungura belen untin goyen bebak ten ten gote belnenbe gahade: al kurat sabareb Yesu Kristube Al Kurun Urmin gega, al hen megen gar hinhin yekeb saba gobe fudinde Al Kurun belen untin yen nurnayin. ³ Munan al kurat sabare Yesu nin gwaha mat ma tagalkeb al gote sababe Al Kurun hitte mat ma watin yen nurnayin. Al gobe Yesu Kristuyen asogom gote saninde gwaha yen hiyen. Yesu Kristuyen asogom gobe wayyen yeke nurde hanjen gobe gogo bikken wayun geb, megen gar hi.

⁴ Be, dirinne yago, denbe Al Kurunyen alya bereya. Irdeb Holi Spirit den bana hi gote tarenbe Satan megen nin mar basina yirde Yesu Kristu asogo irde hi gote taren fole irde hi geb, den wor usi porofet goyen fole yirde hanjen.

⁵ Porofet falkuk gobe megen nin mar. Ningeb megen nin marte dufay po gama irde saba tagalde

hanyen. Irkeb megen nin marbe fudinde yen nurde hanyen. ⁶ Goyenpoga nenbe Al Kurunyen alya bereya. Ningeb al kura Al Kurun nurd unen han marbe saba tagaltekeb tumnan fudinde yen nurde han. Munan Al Kurun ma nurd unen han marbe saba tagaltekeb usi yen nurde han. Ningeb mata gwaha tikeb al gobe Satanyen usi mere go minyan ma Holi Spirityen mere fudinde go minyan goyen yenen bebak ten hityen.

Al Kurun nin amanen nurde ha kenem al hoyan nin wor amanen nurde hayin

⁷ Be, kadne yago, nen belen kadrinin ge amanen nurd yunen yunen mata gobe Al Kurun belen duntin. Irde al kura kadam nin amanen nurd yunen han mar gobe Al Kurunyen dirnen wen hitin geb, Al Kurun nurd unen han. Ningeb kadrinin ge amanen nurd yunen hitek. ⁸ Al Kurunbe alya bereya amanen nurd yunen yunen gote min al. Ningeb al kura kadam nin amanen ma nurde yunen han marbe Al Kurun ma nurd unen han. ⁹ Al Kurun belen alya bereya goyen bubulkunne wor po yen nurde yunen hiyen gobe gaha mat dikala diryin: yenbe nen al megen nin gayen yanya huginen hitek yenbe Urmin unken mun goyen nen gake ten kamyen go yen nurdeb ten kerke megen gar katin. ¹⁰ Ningeb nen belen wa Al Kurun nin amanen nurde untirin mon. Nen belen gwaha irtinenbe yen belen po bubulkunne wor po yen nurde dunenbe mata buluninin halde dune yen Urmin ten kerke megen gar katen nen ge ten kamyin. Ningeb gwaha diryin gobe al hoyan nin amanen nurd yunen yunen mata

fudinde wor po. ¹¹ Ningeb, kadne yago, Al Kurun belen gwaha mat nen gayen bubulkunne wor po yen nurd dunen hi geb, nen wor kadinin ge amanen nurd yunen hitek. ¹² Al kura Al Kurun ma kintin gega, kadinin ge amanen nurde yunen hitekbe Al Kurunbe nenya hitek. Irde yen belen alya bereya nin amanen nurd yunen yunen gote iginenbe nen hitte kurun wor po forok yiyyen.

¹³ Be, Al Kurun belen Holi Spirit dunyin geb, Al Kurunbe nenya hike nen wor yenya hite goyen Holi Spirit belen gab bebak dirde hike nurde hityen. ¹⁴ Irdeb Al Kurun belen Urmin goyen alya bereya kurun gayen Yumulgan ten ten Al hewon yen ten kerke megen gar katyin hinhin goyen dilyninde kenen hinhet geb goke gago tagalde hite. ¹⁵ Ningeb al kura Yesube Al Kurun Urmin yen nurd unen han marbe Al Kurunbe yenya han, irke yen wor Al Kurunya han. ¹⁶ Ningeb Al Kurun belen nen gayen bubulkunne wor po yen nurde dunen hi yen nurdeb yen hitte po tawun hen hityen.

Gwahade ningeb Al Kurunbe alya bereya amanen nurde yunen yunen mata gote min al. Ningeb al kura kadom nin amanen nurde yunen yunen mata ten hi al gobe Al Kurunya har, irke Al Kurun wor al goya har. ¹⁷ Ningeb gwaha matbe Al Kurun belen alya bereya nin amanen nurd yunen hi mata gote iginenbe nen belen ga kawan forok irde pasi irtek. Gogab Yesu mata igin ten hinhin gwahade po, nen wor megen gar henyabe gwaha ten hitekbe kame yen belen

wanj al iginya bulunya pota yird yird nalureb merem yanj ma diryenj. Irkeb diliñ mar huwartek goke kafura ma hetek. ¹⁸ Fudinde, al kura Al Kurun belen bubulkunne wor po yenj nurd unen hi goyen bebak tenj hiyen al gobe kafura dufay minjon hiyen. Gega al kura Al Kurun belen mata bulunminj goke merem yanj yiryen yenj nurde hiyen al gobe Al Kurun ninj kafura henj hiyen. Go tenj hiyen gobe Al Kurun belen bubulkunne wor po yenj nurde yunen hi goyen igin wor po bulun kuram monj goyen kenkela bebak ma tenbe gogo kafura henj hiyen. ¹⁹ Al Kurun wa nenj gayen bubulkunne wor po yenj nurde duntin geb, nenj wor yenja kadinin yagoya ninj amanen nurde yunen hite. ²⁰ Munan al kura, “Nebe Al Kurun ninj amanen nurde unen hime,” yen hi gega, kadom ninj amanen ma nurde haram irde hi al gobe usi al wor po. Al gobe kadom diliñde yenen hi goyen goke amanen ma nurde unen hi kenem Al Kurun epte ma kentek al gobe dahadem amanen nurde unen hiyen? Epte monj. ²¹ Ningeb Al Kurun belen saba kura dirtin gobe gahade: al kura belen Al Kurun ninj amanen nurd unen hi kenem kadom ninj wor amanen nurde unen hiyen.

5

Yesu nin dufayminj sanin irde hanj marte mata

¹ Be, al kura Yesu Kristube fudinde Mesaia yenj nurde hi al gobe Al Kurunyen dirin. Nenj megen ninj albe al kura goke amanen nurde hityen kenem urminj ge wor amanen nurde unen hityen.

² Ningeb nenbe daha mat Al Kurunyen dirnenj

wenj goke amañen nurde yunen hite yen nurtek? Gobe Al Kurun nin amañen nurde unen sabamin po gama irde hitek. ³⁻⁴ Fudinde wor po Al Kurun nin amañen nurde unen hityen kenem sabamin goyen kenkela gama irde mata ten hitek. Al Kurunyen dirnen wenbe megen nin marte mata bulun goyen igin pel irde fole irtek han geb, Al Kurunyen saba go gama irtek gobe metenen mon. Megen nin marte mata bulun goyen pel irde fole irde hityen gobe dufayninin Yesu nin taren irde hite geb, gogo fole irde hityen. ⁵ Goyenbe ganun belen megen nin marte mata bulun goyen pel irde fole irde han? Al kura Yesube Al Kurun Urmin yen dufaymin yenge taren irde han mar gore po gab megen nin marte mata bulun fole irde han.

⁶ Be, al kura, “Fe baptais ten gab meten tiyen, irde darine wok irde kamen,” yen megen gar katyin al gobe Yesu Kristu. Yenbe fe baptais po tenbe meten tiyen yen ma wayyin. Darim wok irde kamde kamde nin manan wayyin. Yesu wan gwaha tiyyin goke tagalde hi al gobe Holi Spirit. Holi Spiritbe mere fudinde po ten hi gore goke tagalde hi. ⁷ Ningeb Yesu nin kenkela bebak titek detbe karwo gago: ⁸ Holi Spirit, irde Yon Baptais belen fe baptais iryin goyabe Yesu darim wok irde kamyinya gogo. Det karwo gobe al unken Yesu goke po yen han, hoyan nin ma yen han. ⁹ Al megen nin belen kadom nin tagalke fudinde yen nurde hityen. Goyenpoga Al Kurunyen merebe det kurun wor po, al megen ninde mere folek. Ningeb Al Kurun goreb Urmin goke momon dirde hiyen geb, fudinde wor po yen nurde hityen.

¹⁰ Ningeb al kura Al Kurun Urmin nin dufaymin sanin irde hi al gobe Al Kurun belen Urmin goke tagaltin gobe fudinde yen nurde hi. Munan al kura Al Kurun nin hekken ma nurde hi al gobe Al Kurun belen Urmin goke tagaltin goyen fudinde yen ma nurde hi geb, Al Kurunbe usi al yen hi. ¹¹ Be, Al Kurun belen Urmin ge tagaltin gobe gahade: Al Kurun belenbe yingenya huginen hen hen goyen dunyin, irde huginen hen hen gote min albe Urmin. ¹² Ningeb al kura Urminya awalikde han gobe Al Kurunya huginen hen hen minyan. Munan al kura Al Kurun Urminya awalikde ma han gobe Al Kurunya huginen hen hen goyen minmon.

Nenbe Al Kurunya huginen hen hen goyenninin yan

¹³ Be, nebe den alya bereya Al Kurun Urmin goke dufaytin taren irtin han mar goyen Al Kurunya huginen hen hen matabe dende hitin goyen go nurwon yen asan gago kan dunen hime. ¹⁴ Nenbe Al Kurunyen dufay gama irde det kuran gusunan irtekeb gusunaninin huginen wol hen hiyen gobe nurde hite. Ningeb gwahade po diryen yen dufayninin taren po kerdeya gusunan irde hite gago. ¹⁵ Irde det kuran gusunan irtek kurun goyen wol hen dunen hi yen nurde hite kenem gusunan irtek goyen tumnan yawartek yen nurde hite.

¹⁶⁻¹⁷ Ningeb al kura Yesuyen alya bereya kadom kura belen mata bulun kura tiyyen gega, mata bulun gobe Al Kurun belen igin halde untek kenenbe kadom goke Al Kurun gusunan iryen. Irkeb Al

Kurun belen yenya huginen hen hen goyen go ma goran iryen. Al Kurun dilinde mata igin mon gobe tumnande mata bulun ala po. Al Kurunbe mata bulun igin halde yunyen gega, mata bulun kurabe epte ma halde yunyen. Ningeb mata bulun kura Al Kurun belen igin halde yuntek mata titin mar goke po Al Kurun gusunan irnayin dinen hime. Fudinde, mata bulun kurabe Al Kurun belen epte ma halde yunyen geb, kame huginen kak alare hinayin. Ningeb kadtin kura gwaha ten hi al goke Al Kurun gusunan ma irnayin dinen hime.

¹⁸ Be, Al Kurun Urminbe al kura Al Kurunyen dirin hitin mar goyen kenkela doyan yirde hiyen geb, Satan belen epte ma bulun yiryen. Ningeb al gwahade gobe mata bulun ten teban ma ten han yen nurde hite. ¹⁹ Irde megen nin mar kurun gabe Ungurar yufukde han, munan nen Al Kurun nurd unen hite marbe Al Kurunyen dirnen wen yen nurde hite. ²⁰ Irde Al Kurun Urminbe nen gare Al Kurun nurde unen hinayin yen megen gar wan bebak diryin goyen wor nurde hite. Ningeb Al Kurunbe fudinde yen nurde hite. Fudinde, nenbe Al Kurunya hite. Irde Urmin Yesu Kristuya wor hite. Yesube Al Kurun fudinde wor po, irde Al Kurunya huginen hen hen gote min al. ²¹ Ningeb, dirinne yago, denbe megen nin mar belen Al Kuruninin yen det mali dolon yirde hanyen goyen yenen bebak tenbe yilwa yirde hinayin.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab